

## Morning Dogri (NSD) National News Bulletin 23-05-2024

आकाशवाणी

- लोकसभा चुनाव दे 6में गेड़ लेई चुनाव प्रचार अज्ज संजा संपन्न होआ करदा ऐ। एहदे तैहत 6एं राज्यें ते 2 केन्द्र शासत प्रदेशों दे 58एं पार्लिमानी हल्के लेई 25 मई गी चुनाव करोआए जाने न।
- कलकत्ता उच्च न्यायलय नै राज्य च 2010 ब'रे थमां जारी सब्बने ओबीसी प्रमाणपत्रें गी रद्द करी दित्ता ऐ।
- बुद्ध पूर्णिमा अज्ज देसै दे बक्ख-बक्ख हिस्सें च पूरी धार्मिक श्रद्धा ते जज्बे कन्नै मनाई जा'रदी ऐ। राष्ट्रपति ते उपराष्ट्रपति होरें इस मौके पर लोकें गी शुभाकामनां भेंट कीतियां न।
- ब्रिटिश प्रधानमंत्री ऋषि सुनक होरें राष्ट्रपति चुनाव तौले गै करोआने दा आह्वान कीता ऐ।
- एफआईएच प्रो लीग च भारत दी मर्दे दी हॉकी टीम नै अर्जेटीना गी 5-4 कन्नै हराया।
- आईपीएल क्रिकेट च कल राजस्थान रॉयल्स नै रॉयल चैलेंजर्स बेंगलुरु गी हराया।

<><><><><><>

### 6<sup>th</sup> Phase

चला करदे लोकसभा चुनाव दे 6में गेड़ लेई चुनाव प्रचार अज्ज संजा खत्म होआ करदा ऐ। आम चुनाव दे पैहले 5एं गेड़ें दा मतदान होई चुके दा ऐ ते 6में गेड़ लेई 25 मई गी वोट पाए जांगन। इस गेड़ च जम्मू कश्मीर दी इक सीट सनें 6 राज्यें ते दऊं केन्द्र शासत प्रदेशों च फैली दियां 58 संसदीय सीटें च मतदान होग। हरियाणा दिएं सब्बने 10 सीटें दे कन्नो कन्नी बिहार दिएं 8, झारखंड दियां 4, ओडिशा च 6, उत्तर प्रदेश दियां 14, पच्छिम बंगाल च 8, राष्ट्री राजधानी क्षेत्र दिल्ली दिएं 7 सीटें लेई इस गेड़ च वोट पाए जांगन। इस गेड़ च कुल 889 मेदवार अपने सियासी भागें गी आजमा करदे न।

<><><><><><>

## Jammu Kashmir

जम्मू कश्मीर च अनंतनाग-राजौरी लोकसभा सीट दे मतदाताएं च तकरीबन 27 ज्हार विस्थापत पंडत बी शामिल न। इत्थें 25 मई गी वोट पोआए जाने न। विस्थापत पंडतें लेई जम्मू च 21 मतदान केन्द्रें दे इलावा 8 सहायक केन्द्र बी स्थापत कीते गे न की जे अनंतनाग-राजौरी च विस्थापत मतदाताएं दी गिनतरी बड़ी मती ऐ।



## OBC

कलकत्ता हाई कोर्ट नै 2010 ब'रे थमां पच्छम बंगाल च जारी कीते गेदे सब्बे होर दुए पिछड़े वर्ग ओबीसी प्रमाणपत्रें गी रद्द करी दित्ता ऐ। न्यायमूर्ति तपब्रत चक्रवर्ती ते राजेश्वर हुंदी खंडपीठ नै ओबीसी प्रमाण पत्र देने दी प्रक्रिया गी चुनौती देने आली इक जनहित याचिका पर सुनवाई करदे होई एह फैसला दित्ता। हाई कोर्ट दी बेंच नै 2010 दे मगरा तैआर कीती गेदी ओबीसी सूचिएं गी गैर कनूनी करार दित्ता ऐ। अदालतै निर्देश दित्ता ऐ जे पच्छम बंगाल पिछड़े वर्ग आयोग आस्सेआ ओबीसी दी इक नमीं फेहरिस्त तैआर कीती जा। उआं अदालत नै साफ कीता ऐ जे इस चाल्ली दे जारी कीते गेदे प्रमाण पत्रें दी बिनाह पर नौकरी करा करदे जां फही राज्य दी कुसै ताल आली प्रक्रिया च कामयाब होए दे मेदवार दा कोई असर नेई पौग। जनहित याचिका 2011 च दायर कीती गई ही। जेहदे च दावा कीता गेआ जे 2010 दे बाद जारी कीते गेदे सब्बे ओबीसी प्रमाण-पत्र दिएं 1993 दे पच्छम बंगाल पिछड़े वर्ग आयोग अधिनियम बी दरकिनार कीता गेआ ऐ।



## Budhha Purnima

भगवान बुद्ध हुंदी जंयति दे तौरा पर बुद्ध पूर्णिमा अज्ज देसै दे बक्ख-बक्ख हिस्सें च श्रद्धा भाव कन्नै मनाई जा करदी ऐ। राष्ट्रपति ते उपराष्ट्रपति होरें बुद्ध पूर्णिमा दी पूर्व संजा पर राष्ट्र गी शुभकामनां दित्तियां न। राष्ट्रपति द्रौपदी मुर्मू होरें अपने सनेह च आखेआ जे भगवान गौतम बुद्ध होरें सत्य, अहिंसा, हिर्ख-प्रेम सने इंसानियत कन्नै प्रेम दा सनेआ दित्ता ऐ। उनें गलाया जे भगवान बुद्ध हुंदी सहिष्णुता, आत्म जागरूकता ते शैल आचरण दियां सिक्खेआ सब्बने गी मानवता दी सेवा करने लेई प्रेरित करदियां न।

उपराष्ट्रपति जगदीप धनखड़ होरें अपने सनेह च आखेआ जे भगवान गौतम बुद्ध दुनिया सिक्खेआ नैतिक आचरण, दमागी अनुशासन ते ज्ञान च शामिल जीवन दी खोज आस्तै इक परिवर्तनकारी खाका पेश करदियां न। श्री धनखड़ होरें आखेआ जे भगवान बुद्ध दे चार आर्य सत्य ते अष्टागिंकमार्ग ते सिद्धांत लोकें गी करुणा ते अहिंसा बक्खी लेई जंदे न।



## Sunak

ब्रिटेन दे प्रधानमंत्री ऋषि सुनक होरें निर्धारित समें थमां पैहले गै 4 जुलाई गी संसद दा चुनां करोआने दी घोषणा कीती ऐ। उनें आखेआ जे एह ब्रिटेन च संसद दे हेठले सदन 'हाउस ऑफ कॉमन्स' लेई चुनाएं दा समां ऐ। हाउस ऑफ कॉमन्स च 650 मंबर न। श्री सुनक होरें एह घोषणा कन ब्रिटेन च मैहगाई च 2.3 प्रतिशत दी गिरावट दर्ज कीते जाने मगरा कीती जेहड़ी पिछले त्रऊं बरे च सब्बने शा घट्ट ऐ।



## CDS Cyber

रक्षा अमले दे प्रमुख जनरल अनिल चौहान होरें भारत दिएं साइबर रक्षा छमताएं गी होर बी मजबूत करने दी लोड़ पर जोर पाया ऐ। जनरल चौहान होरें कल नमीं दिल्ली च "एक्सरमाइज साइबर सुरक्षा 2024" विषे पर लोआए गेदे कार्यक्रम च हिस्सा लेंदे होई सब्बने सरबंधत लोकें गी आपुं च तालमाल रखने पर जोर भरेआ ते उभरा करदे साइबर खतरे कन्ने निबड़ने लेई इक सैह्योगी वातावरण गी बढ़ावा देने आली पैहल दी सराहना कीती। रक्षा मंत्रालय नै आखेआ ऐ जे व्यापक साइबर रक्षा अभ्यास 20 थमां 24 मई तगर रक्षा साइबर अर्जेसी आस्सेआ आयोजित कीता जा'रदा ऐ। एहूदा मकसद सब्बै साइबर सुरक्षा संगठनें गी साइबर रक्षा क्षमता गी विकसित करना ते सब्बने हितधारकें बश्कार तालमेल गी बढ़ावा देना ऐ।



## Vice President

उपराश्ट्रपति जगदीप धनखडु होर 19 मई गी हैलीकाप्टर हादसे च ईरानी राश्ट्रपति इब्राहिम अब्दुल्लाहियन ते दुए ईरानी अधिकारिणं दी मौत पर आयोजित आधिकारिक कार्यक्रम च हिस्सा लैने लेई तेहरान पुज्जी गेदे न। उपराश्ट्रपति हुंदे तेहरान पुज्जने पर ईरान दे अधिकारिणं उंदा सुआगत कीता। केइएं देशें दे राश्ट्रध्यक्ष, मंत्री ते विशेष दूत खीरी संस्कार च शामिल होने लेइ तेहरान पुज्जी गेदे न। राश्ट्रपति द्रौपदी मुर्मू , प्रधानमंत्री नरेन्द्र मोदी ते विदेश मंत्री डॉ. एस.जयशंकर होर बी ईरान सरकार ते लोकें प्रति अपनियां संवेदना प्रगट कीतियां न। कल तेहरान विश्व विद्यालय च सवर्गीय लीडरें दा मुख्ख सारें गी समारोह शुरू कीता गेआ हा। कल तेहरान च ईरानी सरकार नै सार्वजनिक छुट्टी दी घोषणा कीती ही। रायसी हुंदे पार्थिव शरीर गी अज्ज हुदी जद्दी थाहर मशाड च सपुत्रे खाक कीता जाग। भारत नै 21 मई गी राश्ट्ररीय सोहग नै घोषणा कीती ऐ।



## Spain Solar

स्पेन अंतर्राश्ट्रीय सौर गठबंधन दा 99मां मिंबर बनी गेआ ऐ। विदेश मंत्रालय दे प्रवक्ता रणधीर जयसवाल होरें आखेआ जे स्पेन नै नमीं दिल्ली च कल डिपाजिटरी दे प्रमुख्ख, विदेश मंत्रालय दे सांझे सचिव अभिषेक सिंह हुंदे कन्नै स्पेन दे राजदूत जोस मारिआ रिदाओ डोमिग्वेज हुंदी बैठक दरान अंतर्राश्ट्रीय सौर गठबंधन सरबंधत दस्तावेज सौंपे। अंतर्राश्ट्रीय सौर गठबंधन आईएसए अपने मिंबर देश च ऊर्जा दी पुज्ज बनाने, ऊर्जा सुरक्षा गी जकीनी बनाने ते ऊर्जा गी चलाने दे साधन दे तौरा पर सौर ऊर्जा प्रौद्योगिकिणं दी बधा'रदी तैनाती आस्तै सांझा मंच ऐ।



## Hockey

भारतीय मर्दे दी हॉकी टीमै बैल्जियम च प्रो लीग मकाबले च अर्जेटीना गी 5-4 कन्नै हराई दित्ता। मैच दा फैसला शूट आउट कन्नै होआ, जेह्दे च कप्तान हरमनजीत सिंह ते सुखजीत सिंह नै दो-दो गोल दागे ते 5मां गोल अभिषेक नै कीता।

एहदे शा पैहले मंदीप सिंह ते ललित कुमार उपाध्याय नै भारत लेई खेड दरान 1-1 गोल कीता हा। कुल मर्दे दी टीम दा मकाबला मेजबाल बैल्जियम कन्नै होग।



## Hockey Women

भारती महिला हॉकी टीम गी यूरोप दे दौरे दे अपने पैहले प्रो लीग मैच च कल अर्जेटीना थमां 0-5 कन्नै शिकस्त दा सामना करना पेआ। भारती टीम मैच पर अपनी शुरुआती पकड़ बनाई रखने च नाकाम रेही। भारती टीम अज्ज बैल्जियम कन्नै खेडोग।



## IPL

आईपीएल क्रिकेट च कल रातीं राजस्थान रॉयल्स ते रॉयल चैलेंजर्स बैंगलुरु बश्कार खेड्डे गेदे महत्वै आले एलिमिनेटर मैच च राजस्थान रॉयल्स नै रॉयल चैलेंजर्स बैंगलुरु गी चरुं विकटें कन्नै हराई दित्ता। अहमदाबाद दे नरेन्द्र मोदी स्टेडियम च रॉयल चैलेंजर्स बैंगलुरु नै राजस्थान गी 174 रजें दा लक्ष्य दित्ता, जिसी राजसीन नै 19में ओवर च हासल करी लैता। कोहली नै इस मैच च 33 रंज बनाए ते ओह आईपीएल च 8 ज्हार रंज बनाने आले पैहले खडारी बनी गे न। राजसीन रॉयल्स दा अगला एलिमिनेटर मकाबला सनराइजर्स हैदराबाद कन्नै होग।

